

Menghulurkan Bantuan

Daripada Abu Hurairah RA, Rasulullah SAW bersabda:

السَّاعِي عَلَى الْأَرْمَلَةِ وَالْمُسْكِينِ، كَالْمُجَاهِدِ فِي سَبِيلِ اللَّهِ، أَوْ الْقَائِمِ اللَّيْلِ الصَّائِمِ النَّهَارِ.

Maksudnya: "Yang bersegera dalam membantu janda dan orang miskin samalah seperti mujahid fi sabilillah atau yang bangun melaksanakan qiamullail dan berpuasa di siang hari."

Riwayat al-Bukhari dalam Sahih (10/437) Kitab Adab, Muslim dalam Sahih (4/2286-2287) Kitab Zuhud

Pedoman dan Iktibar Hadis

Antaranya:

1. Syeikh Abdullah Nasih Ulwan berkata: Realiti sejarah merupakan saksi terhadap apa yang kita sebutkan. Di bawah ini diterangkan beberapa contoh tentang perlindungan masyarakat Muslim serta simpatinya, kasih sayangnya dan sikap tolong menolongnya:
 - Menurut Muhammad bin Ishak: "Ada orang di Madinah yang hidup dan tidak tahu dari mana punca nafkah kehidupan mereka? Siapa yang memberi kepada mereka? Apabila Sayidina Zainal Abidin bin al-Husyan RA meninggal dunia, maka mereka kehilangan bantuan itu dan barulah mereka mengetahui beliaulah yang membawa kepada mereka pada waktu malam hari yang mereka perlukan. Apabila ia meninggal dunia, orang ramai dapat melihat bekas lebam di belakang dan di tengkuknya kesan dari memikul guni yang dibawanya ke rumah janda-janda dan anak-anak-yatim.

- Diceritakan bahawa al-Laith bin Saad mempunyai pendapatan dari hasil tanaman sebanyak lebih dari tujuh puluh ribu dinar setahun yang semuanya disedekahkan sehingga orang mengatakan ia tidak pernah sekalipun wajib membayar zakat. Pada suatu ketika, dia membeli sebuah rumah yang dilelong lalu wakil beliau pun pergi untuk menerima rumah itu. Didapati di dalamnya anak-anak yatim dan kanak-kanak yang masih kecil dan mereka merayu supaya mereka dibenarkan tinggal di rumah itu. Apabila berita itu diketahui oleh al-Laith beliau menghantar utusan memberitahu mereka bahawa rumah tersebut adalah hak mereka dan pada setiap hari mereka akan mendapat apa yang mereka perlukan.
- Begitu juga diceritakan bahawa Abdullah bin al-Mubarak, seorang tokoh ilmu hadis, banyak sekali memberikan sedekah sehingga sedekahnya melebihi seratus ribu dinar setahun. Pada suatu ketika beliau keluar menunaikan haji bersama beberapa orang sahabatnya. Mereka melalui sebuah daerah dan menemui seekor burung mati. Abdullah menyuruh burung itu dicampakkan dalam tong sampah di situ. Sahabat-sahabatnya telah mendahuluinya sedang beliau terlewat di belakang. Apabila beliau melintasi tong sampah itu tadi dan melihat seorang perempuan keluar dari rumah yang berdekatan di situ lalu mengambil burung yang mati itu. Perempuan itu memberitahunya bahawa dia dan saudaranya adalah orang miskin. Keadaan mereka tiada siapa pun yang tahu dan mereka tidak memiliki suatu pun untuk dimakan. Ibn Mubarak mengarahkan supaya angkatan khalifahnyanya kembali semula dan ia bertanya kepada pembantunya: “Berapa banyak perbelanjaan yang ada pada engkau?” Jawabnya, “Seribu dinar” kata Ibn Mubarak: “Kira dua puluh dinar cukup untuk kita sampai ke Bandar Marwi dan bakinya berikan kepada wanita ini. Ia lebih baik dari kita menunaikan haji pada musim ini.” Beliau kembali dan tidak menunaikan haji tahun itu.
- Apabila berlaku gabungan tenaga dan usaha dari kerajaan, masyarakat dan individu untuk mengatasi masalah kemiskinan maka tidak akan wujud dalam masyarakat Islam seorang miskin pun atau seorang yang memerlukan bantuan. Akhirnya umat Islam akan menikmati dan anggota masyarakat pula terselamat daripada faktor-faktor jenayah dan penyelewangan.
- Kita akan dapat menyaksikan dengan mata kepala sendiri bendera kemuliaan Islam berkibar tinggi di puncak kemuliaan dan pada hari itu orang-orang mukmin akan merasa gembira dengan pertolongan daripada Allah.
- Dengan sikap bertanggungjawab dan perihatin sesama umat sudah pasti membuahakan perasaan rahmat dan kasih-sayang seterusnya sifat tolong-menolong dapat disuburkan dalam masyarakat. Di samping itu, sewajarnya ibu bapa mentarbiah dan mendidik anak-anak supaya mengamalkan sifat suka

memberi bantuan kepada sesama manusia. Jika hal ini dapat disuburkan dan dibudayakan dalam masyarakat, sudah pasti yang susah akan senang, yang miskin akan terbela, yang sakit akan ceria dengan bantuan dan pertolongan dari golongan yang kaya dan mewah sudah pasti keberkatan Ilahi akan menurun kepada masyarakat yang bersifat seperti ini.

Mutiara Hikmah

- ❖ **Umar bin Abdul Aziz berkata:** Perbuatan yang sangat disukai oleh Allah SWT tiga: Memafkan ketika ia dapat kesempatan untuk membalas, adil ketika marah, dan belas kasih terhadap hamba Allah SWT dan tiada seorang yang sayang terhadap hamba Allah, melainkan Allah sayang kepadanya.
- ❖ **Pujangga berkata:** Seorang mukmin tidak akan merasa takut dengan tidak tercapainya dunia, tidak pernah mempedulikannya, dan tidak pernah tergoncang oleh kata henti. Ini kerana ia percaya bahawa dunia ini pasti akan berakhir, tidak berharga dan fana.

Kisah Teladan

Imam al-Zahabi menceritakan tokoh-tokoh dermawan pada zaman tabiin: Pada suatu hari, sekumpulan masyarakat duduk bersembang di dalam Masjidil Haram selepas mengerjakan solat Isyak. Salah seorang dari mereka bertanya: “Siapakah orang arab yang paling dermawan era tabiin ini?”

Seorang lelaki menjawab: “Tabiin paling dermawan ialah Abdullah bin Jaafar bin Abu Talib, iaitu anak kepada Jaafar al-Tayyar.” Seorang lagi menjawab: “Orang arab paling dermawan itu adalah Qais bin Saad bin Ubadah.” Seorang lagi menjawab: “Orang Arab paling dermawan adalah Urabah al-Ausi.”

Mendengar apa yang dikatakan oleh mereka itu, maka kaum muslimin berkata: “Kalau begitu, hendaklah masing-masing dari kita datang menemui setiap tokoh dermawan tadi secara berasingan. Sebelum berjumpa dengannya untuk memintaminta, hendaklah kita menampilkan diri seperti seorang fakir. Setelah menjalankan tugas ini, kita hendaklah berjumpa kembali di tempat ini dan setiap orang akan

menceritakan manakah di antara mereka yang lebih pemurah.”

Seorang yang ditugaskan menemui Abdullah bin Jaafar terlebih dahulu, dia memakai pakaian buruk dan compang-camping. Dia terus pergi untuk menemui Abdullah bin Jaafar. Setibanya di Madinah, dia mendapati Abdullah bin Jaafar sedang menunggang seekor kuda menuju ke Syam. Lelaki tadi terus menghalangi perjalanan Abdullah bin Jaafar. Melihat keadaan itu, Abdullah bin Jaafar berkata: “Sekiranya kamu mendatangkiku ketika aku berada di Madinah, tentulah aku memberikan seluruh permintaanmu ini.”

Sekarang harta yang ada pada diriku hanyalah seekor kuda dan sebilah pedang. Sedangkan aku hendak bermusafir menuju Syam. Kalau begitu, ambil sahaja kuda ini. Demi Allah, mulai dari sekarang aku tidak akan menunggang kuda lagi.

Abdullah bin Jaafar kemudian duduk di bawah sebatang pokok menanti rombongan musafir yang menuju Syam dengan harapan mereka sudi membawanya ke negeri Syam. Lelaki tadi terus mengambil kudanya dan kemudian membawanya ke Mekah.

Manakala seseorang yang ditugaskan untuk meminta-minta kepada Qais bin Saad bin Ubadah pula berangkat menuju ke rumah Qais. Setibanya di hadapan rumah Qais di Madinah, dia terus mengetuk pintu rumahnya dan tidak lama kemudian seorang pembantu Qais datang menghampiri pintu dari luar?”

Lelaki tadi menjawab: “Aku adalah lelaki fakir. Aku datang ingin berjumpa Qais.”

Pembantu rumah tersebut berkata: “Tuan saya sedang tidur, tapi ambil sahaja seribu dinar ini untuk keperluanmu.”

Dalam hatinya berbisik dengan penuh kehairanan: “Seorang pembantu rumah berani menginfakkan harta sebanyak seribu dinar, lantas bagaimanakah dengan Qais?”

Seorang lagi yang ditugaskan berjumpa dengan Urabah bin al-Alusi datang untuk meminta-minta kepadanya. Ketika itu, Urabah sedang keluar dari dalam rumahnya untuk mengerjakan solat Asar dan ditemani dua orang hamba sahayanya. Urabah adalah orang buta dan sememangnya memerlukan dua orang bagi membantunya.

Lelaki tadi terus meminta-minta di hadapannya dengan berkata: “Aku adalah

seorang fakir dan aku datang menemuimu untuk meminta sesuatu kepadamu.”

Urabah menjawab: “Demi Allah, sekarang ini aku sudah tidak memiliki apa-apa lagi, kerana banyak yang telah aku infaqkan sejak kebelakangan ini. Tapi sudikah menerima dua orang hamba sahaya ini?”

Lelaki tadi menjawab: “Kalau kamu berikan kepadaku dua hamba sahaya ini, siapa lagi yang akan membantu perjalananmu menuju ke masjid nanti?”

Urabah menjawab: “Biarlah aku berangkat sendiri ke masjid.”

Lelaki tersebut terus mengambil dua hamba sahaya berkenaan dan kemudian membawanya pulang menuju ke Mekah. Ketiga-tiga lelaki tadi berhimpun di dalam Masjidil Haram selepas mereka berjaya menjalankan tugas masing-masing.

Setiap daripada mereka menceritakan: “Abdullah bin Jaafar sememangnya orang kaya dan dermawan. Dia pasti dikenang oleh masyarakat Arab. Qais bin Saad pula adalah seorang dermawan dan baik hati. Namun kedua-duanya tidaklah sehebat Urabah al-Alusi. Ini kerana dia bersifat pemurah meskipun dirinya fakir. Tambah lagi, dia adalah orang buta dan berjalan ke masjid tanpa sesiapa yang membantunya.

Seorang penyair bersyair:

*“Aku lihat Urabah al-Alusi mengukir kehormatan,
tanpa tandingan dan mereka pasti memujinya.
Jika bendera kemuliaan dan kehormatan dikibarkan,
pastilah Urabah orang pertama yang memegangnya.”*

Sifat dermawan mesti memenuhi beberapa kriteria, di antaranya:

- i. Hendaklah seseorang yang mendermakan hartanya ikhlas kerana Allah, jika populariti dan ingin dipuji sebagai matlamatnya, maka Allah tidak memberikan keberkatan ke atas harta yang didermakan. Malah ia akan menjadi laknat dan seksa ke atas dirinya.
- ii. Tidak berlebihan di samping mengikut cara yang diamalkan oleh ulama salaf. Dengan erti kata lain, seseorang yang mendermakan hartanya tidak dibenarkan membazir. Ini kerana sikap membazir adalah sahabat syaitan.

Allah SWT berfirman:

إِنَّ الْمُبَذِّرِينَ كَانُوا إِخْوَانَ الشَّيَاطِينِ ۖ وَكَانَ الشَّيْطَانُ لِرَبِّهِ كَفُورًا

Maksudnya: Sesungguhnya orang-orang yang membazir itu adalah saudara-saudara syaitan, sedang syaitan itu pula adalah makhluk yang sangat kufur kepada Tuhannya.

(Surah al-Isra': 27)

Allah SWT berfirman:

وَالَّذِينَ إِذَا أَنْفَقُوا لَمْ يُسْرِفُوا وَلَمْ يَقْتُرُوا وَكَانَ بَيْنَ ذَلِكَ قَوَامًا

Maksudnya: Dan juga mereka (yang juga diredai Allah itu ialah) yang apabila membelanjakan hartanya, tiadalah melampaui batas dan tiada bakhil kedekut, dan (sebaliknya) perbelanjaan mereka adalah betul sederhana di antara kedua-dua cara (boros dan bakhil) itu.

(Surah al-Furqan: 67)

Allah SWT berfirman:

وَلَا تَجْعَلْ يَدَكَ مَغْلُولَةً إِلَىٰ عُنُقِكَ وَلَا تَبْسُطْهَا كُلَّ الْبَسْطِ فَتَقْعُدَ مَلُومًا مَّحْسُورًا

Maksudnya: Dan janganlah engkau jadikan tanganmu terbelenggu di lehermu, dan janganlah pula engkau menghulurkannya dengan sehabis-habisnya, kerana akibatnya akan tinggallah engkau dengan keadaan yang tercela serta kering keputusan.

(Surah al-Isra': 29)

iii. Hendaklah harta yang didermakan disalurkan kepada orang-orang yang memerlukan.

Ini kerana, sesetengah orang yang suka mendermakan hartanya, namun diberikan kepada orang-orang yang kaya dan sebenarnya mereka tidak memerlukannya. Ini merupakan salah satu daripada contoh sifat pemurah dan mendermakan harta bukan pada tempatnya.